

## მხარე ვაზებში გამოხვეული

ყანა კახური, ათქვირებული,  
და ყამირები ყარაიასა;  
ვაზი თორმეტი ფურის ნაწველი,  
დასხმული ოქროს ბარძიმივითა,  
წინანდლის ღვინო დედისრძიანი;

თაფლი - ხეებზე ჩამოღვენთილი,  
ბროწეულის ტყე წყაროებითა;  
ცა - არწივების კლანჭით გარტყმული,  
მთები - ფერადი დროშებივითა,  
ნაციხარები ქვასისხლიანი...

მხარე - ნათხარი სამირკველების,  
მხარე - სარკინე ფალავნებისა,  
მხარე - ვაზებში გამოხვეული...  
იქ ფერფლი ჰყრია ჩემი ყრმობისა,  
ფერფლი ლერწამის ნაცარივითა...

1923 წ.